


# महतारी

आपणी सेखावाटी पहचाण

जनवरी सून मारच-2022

जद ताई आपां ओ जाणा कि जिंदगी के है  
जणा ताई बा आदी खतम हो ज्याय है



# सरकार की योजना

## राजस्तान मुख्यमंत्री युवा संबल योजना क्या है?

राजस्तान मुख्यमंत्री युवा संबल योजना म राजस्तान सरकार, पड्या-लिख्या बेरोजगार छोरा-छोर्या न नोकरी न मिलै जतरै वानै खरचा क्ले रुपिया देवै है। यो बेरोजगार भत्तो देस का सगळा पड्या-लिख्या बेई है। छोरा नै हर महना का 3000 रुपिया अर छोर्या नै 3500 रुपिया भत्तो मिलै है।

## राजस्तान मुख्यमंत्री युवा संबल योजना म कतरा रुपिया मिलै है

मिनक	रुपिया
छोरा/मोटचार	3000 रुपिया
छोरी/लुगाई	3500 रुपिया
हिजड़ा	3500 रुपिया

## मुख्यमंत्री युवा संबल योजना 2022 वले जरुरी कागजात

आधार कार्ड

जाति परमाण पत्तर

बैंक खाता की सगळी जाणकारी

बी. ए. की मारकसीट

एक साल को आय परमाण पत्तर

10वीं कक्सा की मारकसीट

राजस्तान म रहबा को परमाण पत्तर

## राजस्तान मुख्यमंत्री युवा संबल योजना

1. योजना को लाभ बिनै ई मिलै गो ज्यों कोई सरकारी काम धन्धो कोनी लाग रह्यो है।
2. राजस्तान का बेरोजगारा न यो भत्तो जिसूँ देवै है क बो खुद का पगां प खड़ो हो सकै अर कोई बी नोकरी हैर लाग सकै।
3. राजस्तान का एक लाख सूँ बी ज्यादा बेरोजगार छोरा-छोरी ई योजना को लाभ लेर्या है।
4. राजस्तान का बेरोजगार छोरा/मिनखा न 3000 (तीन हजार) रुपिया अर छोर्या/लुगायां न 3500 (तीन हजार पान सो) रुपिया को लाभ देर्या है।

## ई योजना नै कुण ले सकै है

1. या योजना राजस्तान की है जिमें लाभ लेबाळो राजस्तान को रहबाळो हैणो चावै।
2. अगर थहे एक गरीब परिवार सूं हो अर थहारां कुणबा की कमाई 3 लाख सूं कम है तो थहनै आय परमाण पत्तर देणो पडैगो।
3. मुख्यमंतरी युवा संबल योजना का फारम नै विकलांग (लूल्हो-लंगडो, काणो, बहरो, डूँडचो, आँधो), अनुसुचित जाति (SC), अनुसुचित जन-जाति (ST) लुगाई-मिनख/ छोरा-छोरी भी भर सकै है।
4. ई योजना की सबसूं खास बात या है क बिको लाभ लेबाळा कम सूं कम बी. ए. पास होणा चावै।
5. राजस्तान सरकार को खहबो है क ई योजना को लाभ लेबाळा छोरा/मिनख कम सूं कम 21 सूं 30 साल का अर छोर्या/लुगाई 21 सूं 35 साल की होणी चावै।
6. अगर थहारो ब्या राजस्तान का रहबाळा सूं हियेडो है अर थहे राजस्तान म ई रहर्या हो तो थहे ई योजना को लाभ ले सको हो।
7. ई योजना को लाभ एक परिवार म सूं दो जणा ई ले सकै है।

## मुख्यमंतरी युवा संबल योजना 2022 लाभ अर खास बातां

1. ई योजना को लाभ लेता-लेता नोकरी हेर सकै है।
2. ई योजना को लाभ राजस्तान म रहबाळा सगळा बेरोजगार ले सकै है।
3. ई योजना सूं राजस्तान का बेरोजगार छोरा/छोरी, अपणा दादा-दादी सूं सायता लिया बिना बी पडाई कर सकै है।
4. राजस्तान का बेरोजगार खुद की जरूरतां क्ले कोई की आस करबा की जरूरत कोनी।
5. ई योजना को लाभ लेबा क्ले फारम भरबाळा न अपणौ नाम बेरोजगार दफ्तर म दरज करवाबो जरूरी है।
6. आ बेरोजगार भत्तो राजस्तान का छोरा/मिनखां न 3000 अर छोर्या/लुगाई अर हिजड़ा न 3500 रुपिया देवैगा।
7. राजस्तान मुख्यमंतरी युवा संबल योजना राजस्तान म रहबाळा सगळा पड्या-लिख्या बेरोजगारा न मिलैगो।

आ भत्तो 2 साल तक ई मिलै है। अगर किस्या बी मिनख की 2 साल पूरा होबा सू पहली नोकरी लागज्या है तो फेर बिनै भत्तो कोनी मिलै।

**भरोसो**

## **धमाल (रंग झीणो)**

एहे...रंग झीणो रै राठोड़ो थहारी महफिल को रै रंग झीणो रै [टेर]

एहे...केसरियो तो साफो राजा राठोड़ां कै सोवै रै

अरै भगवा तो सोवै भोळै साधां कै रै रंग झीणो रै [1] टेर

एहे...काना म गजमोति रै राजा राठोड़ां कै सोवै रै

अरै कुण्डल सोवै भोळै साधां कै रै रंग झीणो रै [2] टेर

एहे...कमर्या म कटारी रै राजा राठोड़ां कै सोवै रै

अरै माळा तो सोवै भोळै साधां कै रै रंग झीणो रै [3] टेर

एहे...पगां म पगरखी रै राजा राठोड़ां कै सोवै रै

अरै हातां म कमण्डल भोळै साधां कै रै रंग झीणो रै [4] टेर।

**यखो...आपां**

**जदै कठै कोई**

**को चोखो कर**

**रेवां है तो,**

**“जदै अपणे तले**

**बी कठै चोखो हो**

**रह्यो है।”**

## **कहानी (भाठा पै बोजा)**

गरमी कै दोफारी म एक कास्तगार बांस कै झुरमट मांय बणेड़ी संत की कुटिया कै कन डट्यो। बो संत नै एक बोजा कै तळै बेठ्या नै देख्यो। कास्तगार बोदरेसन म बोल्यो, ‘नाज की हालत भोत माड़ी है। मनै लागै है कि आबकै गुजारो कोनी होवै।’ संत सुण’र खैयो, ‘तनै चाये कि तू भाठा नै पाणी दे।’ कास्तगार ई बात को मतबल संत नै पुछ्यो तो संत बिनै आ काहणी सुणाई। एक कास्तगार कोई संत की कुटिया कै कनकी जार्यो हो। बो देख्यो कै संत बाल्टी म पाणी ले’र जाय है। कास्तगार बिनै पुछ्यो कै बै पाणी कठे ले’र जार्या है। संत कास्तगार नै बतायो कि मै भाठा नै पाणी देवूं हूं, जिसूं बापै एक दिन बोजा उगसी। कास्तगार नै ई बात पै भोत अचम्बो होयो अर बो मान देतो होयो झटपट ई बठे सू हांसतो होयो चलगो। संत रोजिना भाठा नै पाणी देता रह्यो। थोड़ा दिना पाछै भाठा पै सिंवाळ उग्याया। सिंवाळ म बीज आ’र पड़गा अर बै उगगा। मतबल ओ होयो कि भाठा पै बोजा उग्याया।

**सीख:-** बेगार करबा सू कोई बी कार सोरो हो सकै।

**ठिकाणो**

**निरमाण सोसायटी**

**नोलगड, सुंसनु, राजस्थान, पिन कोड - 333042**

**मो.9587593455, 9660663776**

**Email- rajasthanlanguages@nirmaan.org.in**

**Web- www.nirmaan.org.in**